

Här Fernand Etgen

President vun der Deputéiertechamber

19, um Krautmaart

L-1728 Lëtzebuerg

Lëtzebuerg, den 2. Juni 2021

Här President,

Sou wéi d'Chambersreglement et virgesäit, biede mir lech, dës parlamentaresch Fro un den Här Finanzminister weiderzeleeden.

Den 1. Juni huet d'EU-Kommissioun sech op nei Steierreegele fir Entreprise mat engem Joresëmsaz iwwer 750 Milliounen Euro gëeent. Si mussen hiren Ëmsaz, hir Beneficer, d'Zuele vun hire Mataarbechter an déi ofgefouert Steiermontanten zukünfteg opgeschlësschelt no EU-Land publizéieren. Vill ONGe gesinn heira laut dem Artikel "*Es werde Licht*", deen den 2. Juni am Lëtzebuerger Wort publizéiert gouf, eng Méiglechkeet fir déi legal Steieroptiméierung vu sou Firmaen ze "*bekämpfen*". Obwuel et sech hei em ganz legal betriblech Mesuren handelt, ass effektiv säit Joren a wäiten Dealer vun der nationaler an internationaler Press, an och bäi villen europäesche Parteien eng Tendenz ze beobachte, fir des Praxis moralesch unzepzangen an enger Illegalitéit gläichzestellen. Et sief duerfir drun erënnert, datt privat Firmaen nom Aktionärsrecht dozou verpflicht sinn, fir déi legal Méiglechkeete vun der Steieroptiméierung sou wäit wéi méiglech ze nutzen, fir am beschte Sënn vun hiren Aktionäre ze handeln.

Weider heescht et an deem uewen zitéierten Artikel aus dem Lëtzebuerger Wort, datt déi Lëtzebuerger Widderstänn géint des Reform doduerch ëmgaange goufen, andeems de Sujet net dem Stëmmreglement zu Steier- mee Comptabilitéitsfroen ënnerstallt gouf, sou, datt des Decisioun just eng qualifizéiert Majoritéit, awer keng Unanimitéit virausgesat huet.


An deem Zesammenhang géife mir dem Här Finanzminister gär des Froe stellen:

- 1) Wéi eng Appreciatioun huet d' d'Regierung iwwer dës nei Regelung? Ass et korrekt, datt dës als Comptabilitéitsmossnahm duergestallt gouf fir d'Eestëmmegkeet ze emgoen? Wa jo, huet d'Regierung probéiert den Ordre du jour änneren ze lossen? Wéi huet si ofgestëmmt?
- 2) Wéi gedenkt d'Regierung d'Interesse vun der Finanzplaz Lëtzebuerg an Zukunft op EU-Niveau ze verteidege, wa si duerch fragwürdeg juristesche Interpretatiounen sou liicht iwwerstëmmt ka ginn, wéi am aktuelle Fall?
- 3) Steet d'Regierung am Austausch mat aneren EU-Partner wéi Holland an Irland, deenen hir Interesse vun dëser Decisioun och potenziell negativ betraff sinn?

Mat déiwem Respekt,



Fernand Kartheiser  
Deputéierten



Roy Reding  
Députéierten



LE GOUVERNEMENT  
DU GRAND-DUCHÉ DE LUXEMBOURG  
Ministère de l'Économie

Luxembourg, le 6 juillet 2021

Le Ministre de l'Économie  
à  
Monsieur le Ministre aux  
Relations avec le Parlement

**L-2450 LUXEMBOURG**

Réf. : QP4413-02/SW-rg

**Objet:** Question parlementaire n°4413 du 2 juin 2021 de Monsieur le Député Fernand Kartheiser et de Monsieur le Député Roy Reding

---

J'ai l'honneur de vous transmettre ci-joint la réponse commune à la question parlementaire reprise sous rubrique.

Pour le Ministre de l'Économie

Tom Theves  
Premier Conseiller de Gouvernement

Dossier suivi par : Stéphanie Wagemans, tél : 247-88425 ; email : stephanie.wagemans@eco.etat.lu

**Gemeinsam Äntwert vum Wirtschaftsminister, Franz Fayot, a vum Finanzminister, Pierre Gramegna, op d'parlamentaresch Fro n°4413 vun den éierbaren Deputéierte Fernand Kartheiser an Roy Reding iwwert d'“Transparence fiscale des entreprises”**

An hirer parlamentarescher Fro bezéien sech déi éierbar Deputéiert op en Artikel aus dem Lëtzebuenger Wort, an dem déi nei Steuerreegele fir Entreprise mat engem Joresëmsaz vun iwwer 750 Milliounen Euro diskutéiert ginn, nodeems den Conseil an d'Europaparlament sech den 1. Juni 2021 op een finalen Text virleefeg gëeenegt haten. Dësen Text baséiert op enger Direktivpropos vun der Europäescher Kommissioun (COM/2016/0198 final) vum 12. Abrëll 2016 an ass allgemeng als “CbCR (Country-by-Country Reporting) public” bekannt.

Et ass op dëser Plaz wichteg ze bemierken datt dës Reegele fir déi betreffen Entreprises net komplett nei sinn, wëll dës Entreprises zanter 2016 op der Basis vun der Direktiv (UE) 2016/881 vum Conseil vum 25. Mee 2016 (déi esou genannten Direktiv “DAC4”) de Steierverwaltung Steier-relevant Donnéeën zur Verfügung stellen, déi doropshi mat den Steierverwaltung vum den anere Memberstaaten ausgetosch ginn. Wat awer nei ass, ass d'Publikatioun vun dëse Steier-relevanten Donnéeën. Obwuel den CbCR public sech ganz staark um Inhalt vun der Direktiv DAC4 inspiréiert, soll am Géigesaz zu der Direktiv DAC4 déi eng reng steierlech Finalitéit huet, mat der Publikatioun vun de Steier-relevanten Donnéeën eng erhéicht Transparenz fir d'Éffentlechkeet erreicht ginn. D'Europaparlament an eng Majoritéit vu Memberstaaten hunn d'Direktiv vum CbCR public als eng Comptabilitéitsmoosnam ugesinn (Artikel 50 TFEU - Traité sur le fonctionnement de l'Union européenne).

D'Lëtzebuenger Regierung war vum Ufank un net mam Choix vum Artikel 50 TFEU als juristeschen Grondlag fir dës nei Regelung averstanen. D'Regierung huet während den Negociatiounen, um techneschen, wéi och um politeschen Niveau, d'Stellung vertrueden, datt déi korrekt juristeschen Grondlag eng steierlech Grondlag misst sinn. Dowéinst huet se och d'Meenung vertrueden, datt dësen Dossier, wéi dat och de Fall bei der Direktiv DAC4 war, an enger anerer Formatioun vum Conseil, der ECOFIN-Filière, diskutéiert an, op Basis vun der spezieller legislativer Prozedur (Unanimité), ofgestëmmt sollt ginn. An dësem Sënn huet d'Regierung sech, mat der Ënnerstëtzung vun anere Memberstaaten, aktiv agesat fir den Dossier an d'Filière vum ECOFIN, déi Kompetenz an Steier-Saachen huet, ze bréngen. Dës Beméiungen hunn zu engem Austausch um Niveau vun de Finanzministere während dem Conseil ECOFIN vum Dezember 2019 gefouert. Dës Diskussiounen am Conseil ECOFIN hunn et weder erlaabt d'juristeschen Grondlag ze änneren, nach déi qualifizéiert Majoritéit ze erreche fir d'Negociatioun mam Europaparlament ze lancéieren. Am Februar 2021 huet den Conseil dunn awer déi néideg qualifizéiert Majoritéit fonnt a gréng Luucht gi fir d'Negociatioun mam Europaparlament unzefänken.

D'Regierung huet sech bei der rezenter Ofstëmmung vum finalen Accord, deen den 1. Juni 2021 tëschent dem Conseil an dem Europaparlament fonnt gouf, enthalen. Dëst net mat Bléck op de Fong vum Dossier, mee well Lëtzebuerg mat der Prozedur net averstanen ass, an der Meenung ass, dass dësen Dossier an den Zoustännegkeetsberäich vum ECOFIN Conseil gehéiert hätt.

Um Fong ënnerstëtzt Lëtzebuerg dës Direktive déi méi Steiertransparenz viséiert, wat de Leitmotiv vun der nationaler Steierpolitik zanter 2014 ass. De Grand-Duché ass haut konform mat allen Normen an Direktive vun der OCDE a vun der EU wann et ëm Steiertransparenz geet. Déi lescht Joren hu gewisen, dass déi Lëtzebuenger Finanzplaz näischt vun hirer Attraktivitéit verluer huet, a souguer de Contraire de Fall ass. D'Lëtzebuenger Regierung wäert och an der Zukunft esou gutt wéi méiglech d'Interête vun der Lëtzebuenger Wirtschaft a Finanzplaz um EU-Niveau, wéi och um internationalen Niveau, verdeedegen.